



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

Tir Yimym

tiryimym@aolima

tir yimym

TAPAK 7

Mamata Banerjee-i 'Aparajita' anti-rape bill pelashishia agizük

Mongolia-i Russia Tir Putin pelashishia agizükogo

VOL. XXI ISSUE NO. 322 (ADOK 322) DIMAPUR RASEMNÜ (WEDNESDAY) RONGJUI (SEPTEMBER) 04, 202 ₹ 5.00

Naga Students' Federation-i Assam Rifles aitsür

Dimapur, September 3, 2024 (TYO): September 2, 2024 nikhongdang 16 Assam Rifles Battalion, Mao Post sepaitemi Naga nunger lennir Loli Kaihrii dak teka sangshiba aitsür ta Naga Students' Federation (NSF)-i ashi.

Iba nisung ya Loli Kaihrii lir aser pa ya Kalinamei nunger rongnung akhümtsübu agütsüba lennir ka lir. Pa ya Kalinamei Youth and Students' Organisation nung Sports Secretary aser Senapati District Truck Drivers Union nunga Auditor lir. Pa ama nisung ka dak inyakba mapa ya pa temeten anema lir ta NSF-i ashi.

Assam Rifles sepaitemi Kaihrii dak kanga mejungi azük aser pa tekong nung ammetba den tesülen nungi tetsüng agi ajem ta tenüng kuli agütsürtemi ashi. Iba mapang commanding officer Major Anish-i Kaihrii dak azük aser pai bena aliba rifle agi tejak nung yirutsü aser "ni na tepsettsü" ta amokmeren.

Iba sülen Major Anish-i anüng nung injang asem khatokba ajanga temeket nung alirtem kanga aoksatep.

Iba tatalokba ajanga Naga nunger aser Assam Rifles tsüngda ano maneni tesentaktep majungtsüsa kümogo. Assam Rifles-i parnok "Friends of the Hill People" ta ashir saka tang atalokba ajanga Naga nungeri AR dak temulung lema aruba nung kongshiogo ta NSF President Medovi Rhi aser General Secretary Chumben Khuvung nati sangdong ka nung ashi.

Iba tesempatsü mapa inyakba sepaitem merenshitsuä aser iba ama inyakyim magizük. Iba ya meimchir temeten anema inyakba mapa ka lir ta parnok i ashi.

NSF-isa Armed Forces (Special Powers) Act (AFSPA) agientsü takhangba nenshia metetdaksü.

Naga nunger lennir pusemba sayua NSF-i armed forces den amalitep kecha malitsü aser NSF kübok federating units aser subordinate bodies ajaki iba tetuyuba sülen anidaksü ayongzük. Iba ya mendenpurtemisa shisem.

Onoki Kaihrii aser Kalinamei nunger atema maneni temeten bushitsu aser iba mapa inyaktertem merenshidaksütsü ta NSF-isa ashi.

Kohima nung HoOs aser DDOs arangshir

Dimapur, September 3, 2024 (TYO): September 3, 2024 nungi Administrative Training Institute, Kohima nung Heads of Offices aser Drawing & Disbursal Officers (DDOs) atema service matters training tenzükogo.

"Sorkar ketdangsubaren ajungtsü atema iba training ayongzükaga agir. Mapa inyaker ka timi benshitsu aser nem temeten agütsütsü atema iba sentong agir" ta Commissioner & Secretary, P & AR, Anoop Khinchi, IAS-i ashi.

"Nisung kati service rules junga meteta melira mapa inyaker ka dak tim masüba inyaksü akok mesüra temeten magütsü akok aser iba ajanga pa/la mapa nung tezü atangtsü. Anungji HoOs aser DDOs-i service matters indang rules & guidelines meteta alitsü kanga nungdaker. Iba ajanga sorkar mapa inyaker kati pei tajungtiba agi sorkar tenzüktsü" ta pai ashi.

Tangbo yimjak nung RTI lapoka lir anungji sorkar mapa

inyaktertemi kanga kümdanga inyaksüla ta paisa shisem.

ATI Director & Secretary P&AR, Akunu S. Meyase-i tesentepertem pelaa agizükdang "mezüng anogo nung Health & Family Welfare, Veterinary & Animal Husbandry aser Tourism department tem nungi DDOs aser Senior Officers 110 adener" ta ashi.

State sorkari ketdangsubaren jungdaksütsü atema training agütsüba nung temulung agütsür. Sorkari parnok mapa inyaktertem tiptema ayutsüba aser tashishitsu melii inyaksü atema tebilemstü bena iba training agütsür.

Nagaland nung service matters atema Nodal department ji P&AR Department lir aser PIMS-i iba training ketdangsuba agir.

Anogo 16 nü training nung Heads of Offices, DDOs aser staff 2000 tema dang PIMS, ePayBill, Pension, appointment to services, APAR, maintenance of Service Book aser tanga inyakyim sayutsü.

Tanü NLFT aser ATTF den MoS sign süteptsü

New Delhi, September 3, 2024 (Agencies): September 4, 2024 nü Centre, Tripura sorkar aser National Liberation Front of Tripura (NLFT) o All Tripura Tiger Force (ATTF) tsüngda memorandum of settlement ka nung sign süteptsü.

New Delhi nung agiba sentong nung Union Home Minister Amit Shah adentsü.

Tripura Chief Minister Manik Saha aser Ministry of Home Affairs (MHA) o sorkar nungi tongti ketdangsurtem iba sentong nung adentsü ta MHA-i ashi.

Prime Minister Narendra

Modi-i Northeast renloktsü, telungpur inyaksangshi agientsü, ozüng alema inyakba anentsü aser rara anendaksütsü atema mangdang ayuba ataloktsü atema MHA-i anibelem arema inyaka arur. Prime Minister Modi lenisüba kübok sorkari Northeast nung yimjung aser azükaru bener arutsü atema tongtipang tenangzükba 12 nung sign süteptogo ta MHA-i metetdaksü.

Modi-i aniba sorkari agreements aika nung sign süteptaga ajanga nisung 10,000 shi kati prangpong toktsür temai adokogo ta MHA-isa ashi.

BJP membership drive campaign 2024 tenzükogo



Dimapur, September 3, 2024 (TYO): PHED & Cooperation Minister Jacob Zhimomi den külemi Advisor Tovihoto Ayemi nati Mongulbarnü Kalibari road, Dimapur nung BJP membership drive campaign 2024 tenzüktsüogo.

BJP-i Nagaland kübok assembly constituency 60 prong nung membership drive agitsü aser iba atema district balala nung

MLA temi sentong tenzüktsütsü ta Jacob Zhimomi-i ashi.

"Iba membership drive ya mapa tulu ka lir aser BJP-i tesüiba nunga inyakogo aser nisung aikati BJP nung adentsü imlar anungji tang tajungba inyaksü ama bilemer ta pai ashi.

Prime Minister Narendra Modi-i takok tulu ngua kümsük tasenben atema sorkar len anir.

Nagaland ya tanga state tem ama renlokdkatsütsü atema onoki akokba tashi inyaksü, ta Minister Jacob-isa ashi.

BJP president Benjamin Yephthomi-ia BJP pusemertem dang alima nung political party tulutiba nung adentsü ayongzük.

Nagaland nung tesem 140 nung BJP membership drive agir ta Benjamin-isa ashi.

Kohima District Teachers Award 2024 agütsü

Kohima, September 3, 2024 (TYO): Tesayur 4 nem Kohima District Teachers Award 2024 aser school tekolak 7 nem tenüngsang agütsüba sentong agiogo.

Taküm sempet angurtem ya Zhazolie Metha (Language Teacher GHS Botsa), Kezhalezo Solo (Graduate Teacher (GT) GHS PWD), Albert Tungoe (GT GHS Forest Colony) aser Katia Lohrü (Assistant Teacher, Alderville HSS Jotsoma) nunger lir.

Ano, 'best performing school heads' ji Neingukholie Vielie (Teacher-in-charge GPS Peducha), Supeno Mozhui (HT GMS Phezoucha), Kekhriengulie Khezhe (Teacher-in-Charge GPS Tekhuba), Khrietseinuo Yano (HT GMS Ziezou), Rose Chishi (Vice Principal Dr N Kire GHS Seikhazou), Rukuvito Kikhi (Assistant Headmaster GHS

Sakhabama) aser Rev. Fr. Charles D'souza (SJ Principal St. Paul's Institute, Phesama) nunger lir.

DEO Kohima, Sr SDEO Kohima aser SDEO Chiephobozou ajanga best practice award atema teyari agütsü.

Multi-Purpose Hall, Rüzühkrie GHSS Kohima nung agiba sentong nung Kohima Deputy Commissioner Kumar Ramnikant aser School Education Department Director Wonhungo Tsopoe nati sempettem lema agütsü.

"Kaketshirtemi pei dak aketba sempet jangjatsü aser anitetba nung tesayurtemi tongti shilem agir. Tesayur mapa ya pei asoshi masü saka tangar asoshi bilema inyakba mapa ka lir. Tanü alima nung nisung ajak tejakleni aotsü meranger saka tesayurtemibo kaketshirtem asoshi lenmang

lapoktsür" ta Deputy Commissioner Ramnikant-i ashi.

"Tesayurtem ya kechi tia ka nung lidir liaka kaketshirtem temaba jenjangi atutsü atema sayur. Kaketshir taküm aika nung tesayurtem ya temelenshi tajung bentsür arurtem lir aser tarutsü putuji tanü tesayur ka sayuyim nung ajemdaka lir" ta Kohima DC-isa ashi.

Paisa tesayurtem dang maneni angazüktsü aser tensa den apet shisatsü angutsü merangtsü ayongzük.

"Takok angur ajak nem tenüngsang agütsür aser nenoki maneni tarutsü putu sayutettsü ayongzük" ta Ramnikant-isa ashi.

Iba sentong nung School Education Director Tsopoe aser All Nagaland Private School Association Advisor Zhopota Rhakho natia tajungshi o jembia liasü.

DNSU-i Dimapur nung ILP mapa tenzüktsü akhanger

Dimapur, September 3, 2024 (TYO): Dimapur Naga Students' Union (DNSU)-i Dimapur nung inner line permit (ILP) inyakyim tenzüktsü takhangba agütsüogo.

Home minister Y Patton-i nangzükaka Dimapur nung ozüng alema arurtem mita reprangtsü inyakyim tenzükka mali ta DNSU-i ashi.

1963 küm Nagaland-i state jenjang anguba sülen nungi ILP kübok Dimapur dang maden aser iba ajanga nisung aika ozüng alema arur. Anungji state sorkari Dimapur nung ILP mapa tenzüktsü ayongzük. Iba

parnok i metetdaksü.

DNSU-isa iba dak sendakba nung Chief Minister, Chief Secretary aser Dimapur Deputy Commissioner dangi shidi zülüogo.

Naga nunger ajungtsü atema DNSU-i Dimapur nung non-local nisungtem osang bendentsü ta parnokisa ashi.

December 9, 2019 nü Nagaland sorkari Dimapur district nunga ILP benoka liasü aser iba ajanga Naga nunger aser civil society organizations (CSOs) kanga pelatepa liasü ta DNSU-isa ashi.

Dimapur nung

shishilembabaren ya non-indigenous communities-i 90% azüoka lir ta parnokisa shisem.

"Nagaland state ya khenyongi balaka aser asenok ya ascension/merger agreement nungi masü saka Naga nunger teimba kati magizükaka yimtenren nungdakba nung ajemdaker state akümba lir" ta DNSU-isa ashi.

"Onoki Dimapur nung aliba kin shinga anema menoktaker. Onoki non-locals shinga reshikangshi masüba nangzük. Onoki yimjung aser putepa dang linür" ta DNSU-isa ashi.

NCCAF, ICIMOD aser NSBB ajanga shisadokden senden ayongzük



International Centre for Integrated Mountain Development (ICIMOD), Nagaland State Bio-Diversity Board (NSSB) aser Nagaland Community Conserved Areas Forum (NCCAF) ajanga Hotel Japfu, Kohima nung ayongzükba shisadokden senden nung adenertem noksa nung angur.

Kohima, Rongjui/Sept. 03 (TYO): International Centre for Integrated Mountain Development (ICIMOD), Nagaland State Bio-Diversity Board (NSSB) aser Nagaland Community Conserved Areas Forum (NCCAF) lungjemer Hotel Japfu, Kohima nung September 3-4, 2024 anogotem atema shisadokden senden ka ayongzükba lir.

Iba senden ya "Exploring Other effective Area based Conservation Measures through an Indigenous People and Local communities' lens in Nagaland" omen nung ajemdaker Nagaland nung nüburtemi wazüka aliba tesem balala atema ayongzük.

Mongulbarñu Spongñukshi Ao, CCF (Environment, Biodiversity & Research) aser Member Secretary NSSB ajanga pela agizükba o jembidang, ICIMOD nungi adenba atema pelaba lemsatapa liasü.

Ananü senden nungya tajangzük kanga alitsü, kechiaser shilem agirtem ya libajen wazüka ayutsü asoshi bilema inyakterem lir aser iba senden ajanga koktetsüsa nükjidong yur bushitsü imlar, ta pai ashi.

Samuel Thomas, Sr. Communication Officer, ICIMOD ajanga iba shisadokden ayongzükba indang metetpelaba mapang, iba senden nung lisopur aser nüburtem indang temeden aser shisatsü tali jangjatsü aser 'conservation targets' kar renemtsü imlar, ta ashi.

Nagaland ya bio-diversity peria aliba mechi tesem balaka lir aser Nagaland bio-diversity yanglutsü mesüra raksatsü koktetba putu ka nung asenok alir ta ashi.

Sunita Chaudary, Eco-system Specialist, ICIMOD ajanga iba senden ayongzükba nükjidong lemsatap aser yangji

India nung danga tesemtem nung tawa sangdongba ama CCAs ya OECMS ama sangdongtsü, sorkari yariba nung nüburtemi imlaba lenmangtem bushitsü, stewardship atema senotsü teyari aser mera agitsü atema jembishinütsü dena lir, ta ashi.

Dharmendra Prakash, IFS, PCCF & HoFF, Department of Environment, Forests & Climate Change, Government of Nagaland lenisüba kübok session tasembuba nung presentations session agia liasü.

Iba session nung Spongñukshi Ao, CCF (Environment, Biodiversity & Research) and Member Secretary NSSB ajanga Forest Department, Nagaland tenung nung 'Protected Areas & Other Effective Area-Based Conservation Measures' indang presentation ka agüja liasü.

Ivan Zhimomi, Team Leader, Tizu Valley Biodiversity Conservation & Livelihood Network ajanga Tizu Valley Biodiversity Conservation & Livelihood Network indang osang tongmelang agi agütsü.

Ruchinilo Kemp, Secretary, Sendenyu Community Biodiversity & Wildlife Conservation Board ajanga Sendenyu Community Biodiversity & Wildlife Conservation Board indang osang agütsü aser Savinuo Kikhi, Forest Range Officer, NSBB ajanga Nagaland State Bio-diversity Board indang osang agüja liasü.

Iba sentong nung state kübok CCAs 16 aser sorkar agency balala nungi nisung 65-i shilem agitar.

Mokokchung nung District Level Youth Festival alitsü

Dimapur, Rongjui/Sept. 03 (TYO): District Youth Resources Officer (DYRO) Mokokchung ajanga sangdong ka nung September 16, 2024 nü District Youth Resources Office nung District Level Youth Festival alitsüba indang osang sangdonga liasü.

District nung lanurtem indang sempet balala benjongtsü nükjidong nung iba benjong ya ayongzüksü.

Iba benjong nung sobaliba ken, sobaliba tsüngsang, painting aser declamation densema yimya balala nung tokteptsü.

Lanirtem nem pei sempet sayudaktsütsü asoshi sapang agütsütsüsa iba sentong ya renema lir.


Category balala nung takok

angur nem senpet agütsütsü aser district level nung takok angurtem ya Mokokchung District tenung nung Kohima nung September 26 & 27, 2024 anogotem State Level Youth Festival ayongzüksü aliba nung shilem agitetsü.

Arishi küm 15 nungi 29 tsüngta jangra aliba Clubs mesüra Youth groups temi Office of the DYRO Mokokchung nung arua September 14, 2024 tashinung office mapang register asütsüla, ta sangdong ajanga ashi.

Iba sentong dak sendakba osang tali tejangjaba metetner temi mobile number 8837062195/7005685477 ajanga tongteprateptsü akok.

"Takutet Lenir" ta ser I.S. Sosang taküm otsü kaket sayaogo



(Abelen nungi) I.S. Sosang'er jala tantsüla Wt. Omalemla, kaketzülor Wb. T. Nüngsang Longkümer aser Unity Village Ao Baptist Arogo Pastor Rev. L. Panger Jamir nung "Takutet Lenir" I.S. Sosang kaket sayaba sülen agiba noksa ka angur.

Dimapur, September 3, 2024 (TYO): School headmaster, sorkar ketdangstür aser pastor mapa densema lokti balala nung tanishir süa aruba I.S. Sosang taküm otsü kaket ka August 31, 2024 nü Dimapur nung sayaogo.

Wb. I.S. Sosang ya Molungyimsen nung Pastor aser Evangelist Wb. Imnasama'er (Molung Samar) jabaso liasü aser "Takutet Lenir" ta ser pa taküm otsü kaket ya Wb. T. Nüngsang Longkümer, Retd. Teacher, Molungyimsen-i züluba saya.

Iba kaket ya Unity Village Ao Baptist Arogo Pastor Rev. L. Panger Jamir-i meshiteta sarasademer sayatsü aser sentong nung I.S. Sosang'er jala tantsüla Wt. Omalemla-i kaket zülur aser teyariteper ajak dang pelaba metetdakja liasü.

I.S. Sosang ya lanuwa nungi sempet aika keta aliba nübo ka liasü aser yimertemia kanga temulung süa pa tain akümtsü kanga yongyaa liasü ta kaket nung shia lir.

Pai tangar oshi angazüksüba kanga jangra aser iba den tangazüksüa yamaji temela liasü aser iba jagi pai English aser Assamese oshitem kanga junga jemb aser aji agi pa tangar dang nungi alakteta "Takutet Lenir" liasü ta kaket ajanga ashir.

Ano, 1954-57 tashi Naga lima

tensa kanga mejungi aliba mapang I.S. Sosang ya India sorkar kübok Political Officer ka liasü. Pai 1953-57 tashi Liaison Officer, Amguri inyak aser iba sülen 1958-63 tashi Area Superintendent Tuli inyak aser iba ajanga Area sangeri teyari aika ngua liasü.

Sorkar mapa nungi anisingzük anguba sülen I.S. Sosang-isa Molungyimsen Baptist Arogo nung Pastor inyakdang temelenshi aika bentsür aru aser International Evangelical Fellowship (IEF) nunga züngsema Church Campaign aser Revival balala nung shilem agia senzi.

I.S. Sosang-i wadang balala nung shilem agiba kar:

- # Ao Kaketshir Mungdang Secretary (1931-32)
- # Mezüng Molungyimsen Mungdang President (1947-48)
- # Ao Kaketshir Mungdang President (1934-35)
- # Jangpetkong (Changkikong) Senso Mungdang President (1943-44)
- # Ao C.E. (ACYE) Convention President (1946-47)
- # NNC (Naga National Council) member (1949-50)
- # Headmaster Molungyimsen Mission School & 1st U.P. School (1936-48)
- # Headmaster, Wamaken School (1949-51)

Advisor Sethrongkyu-i Mungmung benjong moatsü

Dimapur, Rongjui/Sept. 03 (TYO): Tuensang Town Hall nung September 3, 2024 nü Mungmung benjong amungdang sentong akhumdong ka ama Advisor, IT & Communication, Economic & Statistics and Evaluation, H. Sethrongkyu Sangtam dena liasü.

Iba benjongmung sentong nung jembidang Tuensang nung aliba Sangtam nung tsüngta telungjem aliba sayua iba ama benjong ayongzükba atema Sangtam Union Tuensang Town dang pelaba lemsatapa liasü.

Iba benjong ya kati ka nem

tatok agütsüba, tenüngsang agütsüba aser tesendaktep akangshiba mapang ka lir, ta pai ashi.

Pai benjong nung adenertem dang Sangtam kin ya Naga nung ajanga den yimjung aser tesunep nung alitsü asoshi jenjang ajungketer asütsüla, ta ayongzük.

Tuensang ya Easter Nagaland nung jila tejentiba aser tanüandangtsü ka amai Eastern District ajanga den arütsütepa alinung, Sangtam kin tali saksalemtsüla aser Naga nung asoshi tatishitsü tajung agütsütetsüla, ta paisa ashi.

Iba benjongmung sentong tenzüka Dr. Imsjungba, Pastor SBL Tuensang ajanga sarasadem, H. Bendang Sangtam ajanga pela agizükba o jembli.

Sentong nung Sangtam Sangli Cultural Club ajanga sobaliba ken ka aten aser NPSC tatidang nung takok angur nem Commendation Award agüja liasü.

Iba sentong nung Deputy Commissioner, Tuensang, Lithrongla Tongpi Rutsa-ia o tatsüka jembli aser Atingse Sangtam-i melepzüng o jembli liasü.

NAGALAND POLLUTION CONTROL BOARD							
Signal Point, Dimapur - 797112, Nagaland Tel.: 03882-245727, TeleFax: 03882-245728 Website: www.npcb.nagaland.gov.in e-mail: npcb2@yahoo.com							
AMBIENT AIR QUALITY FOR KOHIMA AND DIMAPUR CITY							
KOHIMA ASER DIMAPUR NUNG MOPUNG MERÜK-MEMERÜKBA JENJANG							
Sl. no	City	Location of air station	Type of area	Monitoring dates			Permissible limit As per the National Ambient Air Quality Standards "Iba tasazük alemabo metudaktsütsüla"
				22.08.2024	28.08.2024	30.08.2024	
1	Dimapur	Bank Colony	Residential	45	45	63	100 µg/m ³
2		Dhobinala	Commercial	59	70	79	
3		NPCB Office, Signal Colony	Residential	36	35	45	
4		Tenyiphe, Chumoukedima	Commercial	18	26	51	
5		Nagarjan	Residential	29	41	54	
6		Viola colony	Residential	17	29	30	
7		Burma camp	Commercial	48	53	67	
8	Kohima	Opposite NST Office	Residential	23	35	24	
9		PWD Junction	Commercial	24	35	31	
10		High School Junction	Commercial	42	61	72	
11		Midland (Upper)	Residential	23	33	30	
12		Forest Colony	Residential	9	27	23	

Iba osang ya nüboritem ajangzüksü atema Nagaland Pollution Control Board-i agütsür.

HOMI BHABHA CENTRE FOR SCIENCE EDUCATION
TATA INSTITUTE OF FUNDAMENTAL RESEARCH
National Olympiad Programme 2024-2025
 in Astronomy, Biology, Chemistry, Physics, Junior Science

Iba sentong nung shilem agitsü jangra aliba kaketshir ajungai **National Standard Examinations (NSES)** (science subjects atema) nung shilem agitsüla, koba **Indian Association of Physics Teachers (IAPT)** ajanga **November 23 aser 24, 2024** anogotem agitsü.

International Olympiads of 2025 nung shilem agitsü asoshi NSE nung qualify asütsü ya mera mezüngbuba lir.

Enroll asütsü atema:
NSEs: <https://www.iapt.org.in> (Aug 21 - Sep 14, 2024)
For more details: <https://olympiads.hbese.tifr.res.in> <https://www.iapt.org.in>

CBC 48143/12.00052425



Shakti bill magizükba anema NCP(SP) party nung tetsürtemi longkak aitba mapang party lenir Supriya Sule aser Anil Deshmuk nati shilem agiba noksa nung angur. Iba bill ya tetsür anema inyaksangshiba atema temerenshi tesashi agütsütsü asoshi benokba lir.

Chhattisgarh nung Maoists züngsem 9 tepset

New Delhi, Rongjui/ September 3 (Agencies): District Reserve Guard (DRG) aser paramilitary Central Reserve Police Force (CRPF) na longjemer tang Chattisgarh kübok Dantewada district nung anti-insurgency operation ka ayongzükba agidar, aser Mongolbarnü sepaitemi Maoists züngsem teku tepsetogo, ta state police-i metetdaksü.

“Tang tashi nung Maoists züngsem teku tepsetogo aser self loading rifle (SLR), 303 Rifle, 315 Bore Rifle densema prangbong aika ngutetogo. Iba meita aoba sentong nung shilem agiba sepaitem ajak kümzükba lir. Meita aoba sentong maneni benoka inyakdar aser inyakyim tembangba sülen osang tejangjaba agütsütsü,” ta police-isa metetdaksü.

Maoists pur iba tesem nung

mongzükba aliba indang itangitertemi osang tejangja ka agütsüba sülen iba meita aoba sentong ya tenzükba liasü, ta ketdangsürtemi ashi. Parnokisa, Mongolbarnü 10:30 ako nungi khatap tenzükba liasü, ta shisem.

Union home minister Amit Shah-i taoba ita Chhattisgarh nung inter-state coordination senden ka ayongzükba menogo.

2023 küm December ita nungi August ita tashi nung security force aser Maoists pur 104 ben khatepogo aser iba mapang iba telok nungi züngsem 147 tepsetogo, nisung 723 puogo aser nisung 622 bendnaga agütsüogo, ta sorkar data ajanga sayuogo.

Coordinated intelligence-based operation tem aser terenlok maparen balala atema local ketdangsürtem nem teyari

agütsütsü asoshi Union sorkari Maoists pur kanga tashi ita aliba tesemtem nung forward operating bases (FOBs) tem amenoka arudar.

Taoba küm December ita nungi tang tashi nung FOB 33 amenokogo, kong Chhattisgarh kübok Sukma nung pezü, Bijapur nung ti, Dantewada nung ana, Narayanpur nung pezü aser Kanker aser Rajnandgaon na nung kaka amenokba densema lir.

Sorkari August ita parliament nung ashiba agi, 2013 küm state 10 nung district 126 nung Maoist puri timtem lendong bener arutsüba 2024 küm tashi nungbo state teku nung district 38 dang kümogo. Sorkarisa, 2010 sülen Maoist pur dak sendakba azütokshi lendong shilem 73 agi tajemba kümogo, ta metetdaksü.

Mamata Banerjee-i ‘Aparajita’ anti-rape bill pelashishia agizük



New Delhi, Rongjui/ September 3 (Agencies): West Bengal chief minister Mamata Banerjee-i, state assembly nung Mongolbarnü benokba ‘Aparajita’ anti-rape bill indang jembiogo. West Bengal CM-i iba state anti-rape bill ya tangar asoshi tatishitsüka aser otsütsüka lir ta shia tenüngsang agüja liasü.

‘Aparajita Woman and Child Bill (West Bengal Criminal Laws and

Amendment) Bill 2024,’ ta nüngja agütsür iba ozüng ya, tetsürtem tashiyim agi shi nung medema raksatsüba aser sexual offences dak sendakba nung inyakyim lepa repringshiba den provisions tasen benoka, tetsür aser tanurtem tekümzükba kübok toktsütsü atema inyakyim akangshitsü nükjidong nung benokogo.

Tetsürtem tashiyim agi shi nung medema raksatsüba ya

humanity anema lir aser iba amala ozüng alema inyaksangshiba ya anendaksütsü atema lokti nung temelenshi nüngdaker, ta shia Bengal CM-i ashiba agi, Opposition-i Angh CV Ananda Bose dang Aparajita bill nung sign asütsü atema ashitsüla. “Iba sülen benoka inyaktüsü onok khuret asütsü,” ta Mamata Banerjee-i assembly nung ashi.

Mamata Banerjee-isa, tetsürtem kümzükba toktsütsü atema temzüng ozüng shitak benoka minyakba atema Ato Kilonser Narendra Modi, Union home minister Amit Shah aser tawa tetsürtem anema inyaksangshiba state tem indang chief minister tem mapa nungi anentsü takhangba agütsüogo.

“Iba bill ajanga onoki central legislation nung metokmeperi alibattem bentettsü merangogo,” ta Mamata Banerjee-i ashi.

Opposition-ia teyari agüja West Bengal Assembly nung iba anti-rape bill ya ajaki mulunga agizükogo.

Office of the Waromung Laishir Telongjem



TEPELA SANGDONGER

Dr. Temsülemla Longchar-i (D/o. Lt. R. I. Wati (Waromung) Christian Studies of the Faculty of Theology, Sam Higginbottom University of Agriculture, Technology and Sciences (SHUATS), Allahabadnungi Doctor of Philosophy (PhD) ngutetogo. La thesis title: “Gender Social Role in Naga Society : Transformative Theology towards Quality of Life for Young Female Adults.” La tang United College of Theology and Missions, Chümoukedima nung tesayur mapa inyaker. Waromung Laishir Telongjem-i Dr. Temsülemla Longchar nem tenüngsang aser tetushi Tsüngrem sentsüwangshi asoshi agütsür aser Tsüngremer wadang tuluba inyaktüsü asoshi sarasademsür. Tsüngremer-i la taküm Pa wadang asoshi maneni mojangma.

Sd/-
Dr. Tinumeren Ozukum
President
Waromung Laishir Telongjem

Sd/-
Mr. Shilu Aier
General Secretary
Waromung Laishir Telongjem

Haryana: Nashi shibelener asütsü ta bilema kaketshir ka tepset

New Delhi, Rongjui/ September 3 (Agencies): Nashi shibelener asütsü ta bilema Haryana kübok Faridabad district nung arishi küm 19 tain kaketshir ka tepsetogo, ta source-i ashi.

Ken o nung aija alisang yagi tanobusang indang gari ya km 25 tashi arishia ao aser tepseta liasü. Iba tatalokba dak sendakba nung nisung pongu puogo.

Asüsang Aryan Mishra, ya par medemer Harshit aser Shanky na den August 23 nü ayaterem nung SUV temerem ka nung oa liasü. Aija alisang yagi ken o ashishiba mapang police dang ashiba agi, SUV ka amshia yimti nung nashi shibelenerkem kari tesem balala asadangdar ta osang angazükba liasü.

Aija alisang shiba pa indang gari nung mena liasü, pai Aryan indang gari anguba sülen anentsü tuyu. Iba gari ya Harshit-i ania aser Aryan-a mena liasü. Aija alisang shiba

SUV nung mena alirtem ya nashi shibelenerkem ta bilem pai parnok arishi tenzük.

Harshit-i gari ya kilometers 25 shi anir aoba sülen Palwal toll plaza nung tenokdangba agütsür aliba ka tsükpoka ai. Iba sülen aija alisang yagi gari dak injang khaloktsü aser Aryan dak kongshia liasü.

Aryan dak akhaba sülen Harshit-i gari anen, saka aija alisang ya parnok gari anasa arua ano Aryan dak teku nung injang ka khaloktsü aser iba ajanga pa asü.

Faridabad Police ketdangsür kati ashiba agi, ken o nung temulung meleme bilema pua alirtem ya Anil Kaushik, Varun, Krishna, Adesh aser Saurav ta jangjaogo. Aija alirtem yagi mezüngbo prangbong ya canal ka nung intokogo, ta shia police anisatsü meranga liasü. Ajisüka prangbong ya mapang tatsüka lir Anil’er kidang nungi nguteta liasü.

CM Soren-i Kharge aser Rahul Gandhi na den ajurutep

New Delhi, Rongjui/ September 3 (Agencies): Jharkhand chief minister Hemant Soren aser pa kinungtsü Kalpana Soren nati Mongolbarnü Congress tir Mallikarjun Kharge aser Lok Sabha nung opposition lenir Rahul Gandhi na den ajurutepogo. Iba senden ya Delhi nung Rahul Gandhi’er kidang mena liasü.

Congress lenirtem den senden amenba sülen Soren-i, “ni mapang talangka nungi parnok den ajuruteptsü sentong yanglua liasü,” ta osangbenertem dang ashi.

Parnok sensaksemba mapang Jharkhand assembly elections indang jembi mejembi ta asüngdang dang JMM tekolakba-i, “iba sensaksemjia yakta agitsü,” ta ashi.

Maneni pai inyakyim ajak shitadak dang odar aser taruba election nung parnok tashi ajak agi tokteptsü, ta ashi. Pai, “ajak

junga dang lir. Onoki sorkar achaayangtsü aser tashi ajak agia election nung tokteptsü, aser iba atema blueprint yakta yanglutsü,” ta ashi.

Tawa JMM lenir tejen aser taoba mapang Jharkhand chief minister Champai Soren-i party tokja Bharatiya Janata Party (BJP) nung August 30 nü Ranchi nung adenba ya Soren-i aniba Jharkhand Mukti Morcha (JMM) atema tetsükdaksü ka asütsü ta repringteter.

BJP nung adenba sülen taoba mapang JMM lenir yagi Ato Kilonser Narendra Modi aser Union home minister Amit Shah na lenisüba dak tamang akaba lemsatapa liasü.

Jharkhand nung tang amenoka aliba sorkar term tatembang ka dangi arudar aser Legislative assembly züngsem 81 atema election taküm küm tatemlen agitsü asoshi renemdar.



TIR YIMYIM YIMOBILEM (EDITORIAL)

DIMAPUR RASEMNÜ, SEPTEMBER (RONGJUI) 04, 2024

India-i Manipur ashioktsür !

Manipur nung Meitei nung'er o Kuki nungertem na azü tokshia rara tenzüker küm ka dak tali süiaka, tensa süngjema akümtsü melen, tangbo 'drone' tashi amshia yimtaklirtem amaktsü tenzüka yagi tsükchir kin Ukraine o Russia na rara ama kümdaktsüogo. Drone ya nisung medeni yima odaktsüba tayimtsü dang ajar. Iba ama tayimtsü ya Covid wara ama timtem mapang nung tesem ka nungi kati mozü ama nisungtem nungdak bener yoktsü atema amshiba asenoki metetogo aser ano tang Russia – Ukraine aser Israel nung'er o Hamas telok na rara nunga drone amshia maktepba angashir. Alima tanabuba tongpang rara tashi nisungi dang bomb abenba tayimtsü anir oa tsükchir alidak bomb ajungokja amak saka tanübo nisung mali ser drone tayimtsü nung bomb sünga oshir yoker aser ali nungi dang droneji nisungi anishir aser bomb ajungoktsütsüba tesem atongdang ali nungi tanishisang jagi dang button ka nung nemer pokloksür. Iba ama tayimtsü tashi amshia state ka nung telok kati telok ka mesüra kin kati kin ka amakbaji parnok asoshi dang masü saka linük ajunga atema lendong aser shisabolutsüka lir. Manipur nungji tangbo yimtak yimtsüng nung dang drone ajanga amakba lendongji atalokogo saka asüng ser yanübo tang amshiba drone dang nungi kanga agia tuluba nung bomb tesashiba bener oagi sepaitem aliba tesem aser state nung tongtibang tesem poksatsütsü kecha temenu maka. Manipur nung kin o kin na azü tokshitepa tsükchitep tenzüker, telongpurtemi Manipur police purtem raraba hadir ayudak tashi makogo aser tang tashi Manipur police pur indang prangpong injang makzüka bener aoba mebushitetter. Imphal lenden nung nisungtem telidak kitem aser tekülemdak tenla kitem aika raksatsüogo, Nisunga noklang aika süogo aser meyrirjang aika talidak maka tang tashi timtem tulu nung lir. Aji oda, Kuki nung'er MLA-tembo tang tashi Imphal nung parnok senden alidak assembly-i mouteter. Iba ama tensa mejungi akümba tashi nunga linük nung ato kilonser Narendra Modi-ibo ano khena oagi anguokaa mereprangdang aser tensa süngjema kümdaktsütsü asoshi süokia ia inyakba mapatema kecha mangur. Yaküm lendong atalokli linük nung kilo kilonser Amit Shah-bo ogo saka pa orr yimjung luden ka tentetsüba sendena khena mementet loksago. Joko Manipur nung ya BJP aser Congress telok ama linük temzüngi melaba telok kati yimsü asür masü saka telongpurtemi dang yimsü asür. Joko, Manipur lima yimti yimdong nunga Manipur police masü saka Meiti nung'er telongpur o Kuki nung'er telongpur teloktem na pei pei litsü nung tashi sayutepa jajaba angur. Aji oda, tangbo Manipur nung state government-i masü telongpurtemi yimsü asür. Iba ama linük temzüng ozüng mamshitetba state government ka nem yimsü sūdaktsüba ajanga parnoka kanga takoksa tulu ngudagi aser linük asoshia ya ser atema tatishitsü tamajung ka tentetsür asütsü. Koba government südir sang, tarutsü atema bilema linük temzüng ozüng merak sai shitak amshitsü merangra, democratic lima nung tanü kari aser asüng kari ta yimsü asütsü saka linük tashi aser telongjembo teti tashi itta alitsü. State ka nung state government-i repranga lia telongpurtem nem pei police station dang masü saka raraba oset ayudak tesem dena makdokdaktur aser yimti anükertema state police masü saka telongpurtemi anüker aser joko telongpur kari drone tashi amshia tai maketba nübortem amaker, saka iba state government nemjisa yimsü sūdaktsür ta asüba ya tajung tazü masü, iba yabo center government-i Manipur ashioktsür asütsü. Iba yabo BJP teloki Congress telok aitsür aser Congress teloki BJP telok aitsür ta asüba agi tajung ka adoktsüba masü saka tejashitepang tuluba akümtsü aser joko tereprangtsüa aser tenünga akhi Manipur state tobosa masütsü. Ibai Russia o America nati Afghanistan nung'er anepalupet amato, India-i Manipur nung Meitei aser Kuki nung'er na anepalupetba mapa aser mapang ka asütsü. Atangji, India-i Manipur kanga mejungi ashioktsüogo.

OLEMSABANG

NAGALAND LIQUOR TOTAL PROHIBITION ACT, 1989: (AROGO TAKOK ASER TAMAKOK)

~ A.M.TOSHI JAMIR

(Yashi adok nungi...)

NLTP Act, 1989 Chapter III, Section 27, clause (1) aser (2) nung zülua aliba-temji mapa küma inyaktsü asoshi Sarkar-i NOTIFICATION ka adok (No.EX/TOXIC/13/89 dated Kohima the 11th December 1990), aser yangji ajemdaker STATE PROHIBITION COUNCIL (State level nung) aser DISTRICT PROHIBITION COMMITTEE (district shia nung) tentet (constituted). Parnok asoshi tongtipang mapaji Yi nokdangba nung State Government aser Local Administration yaritsü aser ajungshitsü asoshi ("to assist and advice the State Government and the Local Administration for prohibition purposes").

STATE PROHIBITION COUNCIL:

(1).Honourable Minister,Excise(Chairman); (2).Secretary,Excise (Member-Secretary); (3).Director, Prohibition (Member); (4).Director, Health and Family Planning (Member);(5).Home Secretary (Member); (6).One representative from Nagaland Baptist Council of Churches (Member); (7).One representative from Nagaland Mothers Association (Member).

Note:Commissioner of Excise (etc) ji ex-officio Director of Prohibition ta angazüker(tejangja re-designation Order-ji Arogo-i bushia ayutsu nungdaker).

DISTRICT PROHIBITION COMMITTEE nung züngsemtem:

(1).Deputy Commissioner (Chairman); (2).Civil Surgeon (Member); (3).Superintendent of Excise/Deputy Superintendent of Excise (Member-Secretary); (4).Superintendent of Police (Member); (5).One representative nominated by Secretary, Nagaland Baptist Church Council;(6).One representative from prominent local public nominated by Deputy Commissioner.

Note:Superintendent of Excise (etc) ji ex-officio Prohibition Officer ta angazüker.(tejangja Re-designation Order Arogo-i bushia ayutsü nungdaker).

AKOK ASUBO(meinyaki lira):Arogo-i item-ya reprangdang (assessment agiba) nung koda? Nur Arogo kupok drugs/yi Lar (addict) kwi-shi ali ? Drugs/Alcohol de-addiction Centres kwi lapoka lir?Item Lar nemji Arogo-i Counselling agütsü nung koda(individually)? Drugs/Yi-Lar(addicts) tem anepaludak lapoka alirtem nem teyari agutsütsü atema Arogo Budget nung SEN enok nung koda? (ano danga inyak nung junger). Arogo takok/tamakok ji item ajanga-a metet-tsü.

Tatem-O: Tesüiba küm-tem meyipa reprangdangra, STATE PROHIBITION COUNCIL aser DISTRICT PROHIBITION COMMITTEEs nungjatem/mapatem-ya kangabo bulua (aiben) mejembi aser mangashi. Saka, STATE PROHIBITION COUNCIL aser DISTRICT PROHIBITION COMMITTEE-tem tenzüka nükjidongtemji ataloktsü asoshi Arogo-i itemji nungit nung ajungtsü südi (the Church must remain supportive and strongly vigilant) ta bushitetter.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Central Nigeria nung Fulani teloki tamanger trok tepset

Abuja, Rongjui/Sept. 03 (Agencies): Fulani shiruru metsür temi Benue state, Nigeria kübok yimtsüung nung alir nisung trok August 23 nü tepseta liasü aser kasa county nung July aser August ita nung Khristanpur tepsetba 38 ajunger, ta osang ajanga ashi.

Prangbong bona aliba shiruru metsür telok kati Agatu County kübok Iwari aser Olegagbane yimtsüungtem amakdang Khristanpur trok tepset aser aika yiru, ta yangji alir Joseph Adayi-i text message ajanga Christian Daily International-Morning Star News dang ashi.

Agatu Local Government Area Council indang chairman Phillip Ebenyakwu-ia iba osang ya shidak ta jangjatsüogo.

“Tawa Fulani shiruru metsür temi yimtsüung kar amakba ya shidak. Aser iba mapang yimdaklir aika tepseta ki rongdoktsü. Tangya yimdaklir 2,000 dak tema iba timtem agi kongshir camps balala nung temeimsü tia nung litar,” ta Ebenyakwu-ia ashi.

July aser August ita amakdang Khristanpur meyirijang aika parnok telidak ki rongdoktsüba yong tesem balala nung prokshia lir. July 14 nü Agatu County kübok Khristanpur timba aliba Egwuma yimtsüung nung Fulani kiralongrar temi nisung 12 tepset aser 11 yirutsü, ta yangji alir Daniel Agyo-i ashi.

“Fulani bandits” temi kasa county kübok Olegomachi yimtsüung nunga July 9 nü Khristanpur par 13 tepset, July 4 nü Aila yimtsüung nunga nisung tenet tepset. Ano lendong danga ka nung tamanger tenet tepset.

“Ajak senteper Agatu Local Government Area nung tesüiba ita ana nung Khristanpur parnok

38 tepsetogo,” ta Agyo-i ashi. Agatu nungi Benue State House of Assembly nung züngsem Godwin Edoh-i ashiba agi, Fulani shiruru metsür temi Khristanpur timba sür aliba tesem tanen makai amaker.

“Nok-nü bener shiruru metsür temi ozü nisung dak tanen makai amakba atema Nigerian sorkari mera tesashi agitsü nüngdaker,” ta Edoh-i ashi.

A z ü d o k s h i b a tembangdaksütsü mechi police tem yoka lir, ta Benue State Command indang odongtar Catherine Anene-i ashi.

Benue state nungsa August 15 nü prangbong agi tuitir Khristan medical students 20 pua bener aoba parnok alangzüktsü asoshi meshiba kecha magütsüi kumzükogo, ta police-i ashi.

Kaketshirtem ya Nigeria north tsütsü Borno state nung public university ka aser Nigeria tiyonglen Jose nungi university ka nungi Enugu yimti nung Federation of Catholic Medical and Dental Students (FCMDS) Annual Convention nung adentsü atema oyaa aliba mapang iba lendong ya ajurua liasü.

Kaketshirtem ya Otukpo-Enugu Highway nungi pua bener ao, ta Makrudi, Benue state nung aliba police temi August 23 nü ashi. Kaketshirtem ya kar Borno state nung aliba University of Maiduguri nungi, kar University of Jos nungi liasü, ta University of Maiduguri Medical Students’ Association indang secretary-general Abass Omotiti-i sangdong ka nung ashi.

“Kaketshirtem ya August 14 anepdang University of Maiduguri Teaching Hospital yutsür University of Jos-i ao

aser yangji aonung mejang. Tasüng University of Jos nungi kaketshir ter dener par 18 ayameso,” ta Omotiti-i ashi.

Benue Medical Students Association ajanga mapang tatsüka lir sangdong ka nung Khristanpur par 20 pua bener ogo ta ashi, kechiaser kaketshirtem den medical doctor kar dena liasü.

Police temi parnok ya August 23 nü kumzük, ta Nigeria Police indang odongtar Olumuyiwa Adejobi-i sangdong ka nung ashi.

“Ntunkon forest, Benue state nung pua aliba University of Maiduguri aser University of Jos nungi kaketshir 20 aser ano Nigeria nung kar August 23 nü chiokba onoki jangjatsür. Kaketshir alangzüktsü asoshi senotsü kecha magütsüi chiok,” ta Adejobi-i ashi.

Open Doors ajanga alima nung Khristanpur alitsü asoshi linük tamajungtiba 50 asadanga 2024 World Watch List nung Nigeria ya jenjang 6 buba nung lir. Alima nung Khrista sülen anidaksü asoshi tesem tamajungtibaji Nigeria ya lir, kong October 1, 2022 nungi September 30, 2023 tsüngta tamanga yimsü mechi nisung 4,118 tepsetogo,” ta World Watch List ajanga ashir.

Nigeria nung Khristanpur pua bener aoba (3,300) danga linük kecha nunga ataloka mali. Tekülem ki aser mozük, school aser leper ama danga ki o jen raksatsüba ya Nigeria nung ama (750) danga linük nung ataloka mali ta ashir.

Muslim Fulani nisungtem ya kin kidong telemsa noklang dak tema Nigeria aser Sahel nung million aika lir, aser parnok kari radical Islamist tesayuba sülen anidaker.

ANOGO ABEN TSÜNGREM DEN

Tenüngsang

“...Khrista miim o nung ni angazükba nenoki angatetsü. Iba miim oji tang Tanela nung..nisung chirtem dang memetdaksü liasü” (Ef. 3:4,5).

Tasen Lai nung tamangertem Tanela Temeshi ajanga Khrista den sendaktepba miim aika jungkai adok. Arogo nung bendanger tamangertem den Yihuda nung tamangertem den arok senmanger aküm. Iba jungkai adokba tongtibangji Tsüngremi Abraham dang nangzükba temoatsütem dangi meyipa kin ajak moatsü. Abraham, Isak, Yakob pamoki iba tenangzükba nung amang.

Saka Israeli anema apuso aser Tsüngrem nungi pila. Pai pamok alima ajak nung prokshidaksü aser magizük, anungji bendangertem dangi ao. Bendanger kintemji Yihuda nung asoshi tesembatsü liasü, anungji parnok nem agütsüba taochi aser yimlibilem atemaji Abraham nungi jakzükertemi mebilem. Aji saka tamangertem ajak nem Abraham temoatsütem agütsütsü Tsüngrem sentong liasü. Miim mapaji ya, Tanela Temeshi ajanga Paul dangi jungkai madoktsü tashi Tsüngremi iba tenangzükba miima dang ayu. Yihuda nungeri mebiIemba bendangertemi agizük. Tsüngrem sentongji kin ajak, oshi ajak temang ka nung temoatsü lemsateptsü asoshi liasü.

Oba, Bendanger temenen nisung ka, Abraham dang nangzükba temoatsü nung shilem agir küm daksüba asoshi ne tenüng asanger.

Office of the **MON TOWN AO BAPTIST AROGO**
P.O. Mon, Pin - 798621 : Nagaland

Mon Town Ao Baptist Arogo ajanga pelaba lemsateper

29th August – 1st September 2024 tashi ABAM-i sponsored süa Mon Town Ao Baptist Arogo nung Father School kanga temoatsü ngua agitetba Arogo ajanga pelaba lemsateper. Sentong asoshi nübo, rongsen ajak tenla-a takok aser temoatsü nung katsüogo. Tebutem ajak agi metsür pungo (25) dena takok nung graduate süogo. Sentong nung shisalen sayur aser teyariteperem :

1. Rev. L. Yapang Mollier Secretary, Church & Mission ABAM, Impur
2. Rev. A. Chuba Jamir Pastor, Kohima Ao Baptist Arogo
3. Mr. Lanu, Kohima
4. Mr. Nüngsang, Kohima
5. Mr. Bendang, ABAM Impur

Tsüngremi nenok mapa tali moajang ta Arogoi sarasademtsür.

Kibubar wadang nung,

Sd/-
Mr. Lipok Pongen,
Pastor

Sd/-
Mr. T. Wati
APH cum Secretary.

Pope Francis-i Asia Pacific linüktem semdang tenzüker



Jakarta, Rongjui/Sept. 03 (Agencies): Pope Francis-i Asia Pacific region semdangtsü tenzüka Mongulbarnü Jakarta tonga aruogo, koba pa kümsük nung meta talangtibai aoba alitsü.

Pai anogo 12 agia ainlen jajaba mapang ano Papua New Guinea, Singapore aser Timor-Leste semdangtsü lir, aser iba mapang libajen tebilemstü aser tamanga yimsü balala tsüngta tesendaktep nung alitsü indang jembia jajatsü imlar. Linük pezü rongnung Timor-Leste nungya Catholic nung timba alir.

December ita nung arishi küm 88 ajungtsü alisang aser

temang nung timtem balala ajurua alisang asoshi tang ainlen jajaba nung tayongzükba jenti lir.

Alima nung Catholic Church ya tesem ishika nung kanga junga züina aor aser item rongnung Asia Pacific ya ka lir.

Pope-i mezüngbo 2020 nung semdangtsü sentong liasü, saka COVID pandemic mechi thinen aser tang pai St John Paul II tsüngsü nung jajatsü, shiba küm 27 tashi Catholic tamanga yimsü nung tekolakba inyakdang linük pezü ya semdanga liasü.

“Tanü ni Apostolic Journey tenzüka Asia aser Oceania nung linük kar semdangtsü. Iba

journey yagi süngjang tajung atangtsü atema imlibilema sarasademjang,” ta pai Hombarnü social media X nung zülua liasü.

Pa 2013 küm shimba sülen Pope-i Catholic Church dang tajenzükba tia nung alir mesüra meta talang nung alirtem Tsüngrem dangi anir arutsü ajungshia liasü.

Indonesia linük semdang rongnung pa ya pope tasembuba alitsü, kong alima nung Muslim nütüng timba alir.

Pa Indonesia nung anogo pezü amungdang Indonesian yimtiba nung mosque tulutiba semdangtsü, tir menden nungi alutsü alisang Joko Widodo ajurutsü aser nisung 70,000 shi atema mass agitsü imlar, ta Vatican News ajanga ashi.

Pai linük semdanga mapang tamanga yimsü balala amanga nüburtem tsüngta arok ajungtsü asoshi jembishinütsü maangka angutsü imlar aser tamanga yimsü aser

kin balala tsüngta tangatettep nung alitsü nüngdaker, ta Jakarta mosque nung grand imam Nasaruddin Umar-ia osangbener dang shia liasü.

Pope-i Indonesia semdanga ya ajanga pai Khristanpur aser Muslim nung tsüngta tajungtiba nung jembishinütsü tejangraba aliba sayur ta aikati ashir.

Papua New Guinea nung Pope ya linük tezülen Vanimo yimti semdanga par Argentina linük nungi missionary tem ajurutsü, shirnok tribal nisungtem külemi alir.

Pope-i semdanga ajanga evangelisation maparen jakdaka tajungba akumtsü, ta iba yimti nung Argentina nung missionary Miguel de la Calle-i ashi.

Papua New Guinea tesem ajunga nungi aser arütsü alema orr Indonesia nungi Pope angutsü atema nüburtem adenshir, ta pai Vatican News dang ashi.

“Transportation peria maliba ajanga nisung karbo anogo aika tetsüng agi jajatar,” ta Father Miguel-i ashi.

Timor-Leste nung Pope-i linük yimtiba Dili nung tzükum anasa mass ka ketdang süa agitsü, kong 1989 küm John Paul II ajanga Catholic nung temulung süngzükja jembia, shirnok Indonesia-i par linük agiba asoshi jashia liasü. Timor-Leste ya 2002 küm nüchiso angu.

Pope Francis-i Asia nung temulung agütsür, aser pai taoba mapang South Korea, Sri Lanka, Philippines, Japan, Bangladesh, Mongolia, Myanmar aser Thailand linüktem semdanga lir.

Ajisüaka tanü tashi pope katia China mesemdangteti lir, kechiaser iba linük nung bishops ya shiri shimtsü ta mangatettep adokba ajanga Vatican aser Chinese Communist Party tsüngta tesendaktep mejungi arur.

AO OSHI ANGAZÜKDAK:

TANÜ ANGAZÜKTSÜBA OJANG



Tambu

(n) tambur, tambusang, ajak dang tasoba küm teimba (oldest, eldest)

* Ozü kibong nung ni tambu ser onok pezü lir.

Tambur

(n) tebur kanga tain (old man)

* Tanü asüng tambur arishi küm noklang tema alir aika lir.

OLONG PAITEP # 6914

Grid for Olong Paitep # 6914 with numbers 1-17 in various cells.

TIPIEN

- 1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 6913 TELANGZÜBA

TIPIEN :

- 1. Tesangra, 5. Mungo,
7. Kisen, 8. Salem, 12. Semki,
14. Kilem, 15. Kensü,
16. Sangpang.

LANGTSÜNGLEN :

- 1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen, 11. Lemta, 13. Ola,
14. Kin.

NAI-A YA METETTER MA



Alima nung bilingual book series (female) ka adokba tanutsülaji Ludhiana, Punjab nungi arishi küm 6 tain Anayasha Budhiraja lir. Anayasha arishi küm 5 asü dang nungi 100 Sanskrit verses (shlokas) züngtet aser lai English aser Hindi nung book series ka zülu.

September 2, 2024 nü Ludhiana Deputy Commissioner Sakshi Sawhney-i Anayasha den ajuruteper aser lai Guinness World Record ngutetba atema atema tenüngsang agüja liasü. Lai züluba "My Journey of Learning 100 Shlokas" aser "How to Learn 100 Shlokas easily" kakettem nung lai yangluba noksatem dena lir.

Manipur tsür yokyayokjirtemi 'drone attacks' anema lungkak ait



Imphal, September 3, 2024 (Agencies): Kuki telungpurtemi Meitei nunger civilian alidak amakba anema Khwairambandh Ima Keithel nungi tetsür yokyayokjirtemi September 3 nü yimdong nung lungkak aitogo.

Kuki telungpurtemi amakdang arishi küm 31 tain tetsür ka asü aser lar jala yirua

lir. Iba ajanga Manipur ajungalen nübortemi jashiteper. Tanü lungkak aitertemi Chief Minister's Bungalow tsütsü ao aser sorkari mapa inyaksü takhangba agütsü.

"Sorkar kechi inyaker? Kuki telungpurtemi drones amshia yimtsüngtem amakdang state nung Governor tasen kechiba ola madoker?" ta lungkak

aitertemi ayimten. "Onoki kin ka samatsütsü atema inyakba mission magizüker. Drone amshia amakba ya rara nung amshir saka ozü yimtsüngtem amaker. Iba ama tensa ka nung state sorkari ola madokba ya magizüker" ta Khwairamband Keithel Apunba Nupi züngsem Ibeyaima-i ashi.

Lungkak aitertemi BT Road nung Gambhir Singh Market complex anasa tonga aodang police-i parnok noktangtsü merang aser idangji tetsürtemi raratep.

Tetsürtemi police dang Meitei yimtsüng amakertem aputsü takhangba agütsü aser sorkari aibelenertem pua maru tashi lungkak aitba manentsü ta parnokisa ashi.

Chirang nung 'Long live Miya' posters yutsüja liasü

Guwahati, September 3, 2024 (Agencies): Assam kübok Chirang district nung Hombar aonung dokan kishitem nung Miya nunger pusema potser tem maloka yuja liasü.

Vhetagaon, Bijni nung yutsüba posters nung Assamese aser Hindu nunger anema zülur liasü.

Poster tem nung "Assamese domination won't be tolerated. Long live Miya. Down with Hindus" amala zülua liasü aser poster nungsa Miya nunger anema inyakba ajanga Assam nung mepetmesü adoktsü ta amokmerenba zülua liasü.

Iba ajanga nübortemi tebilemtsü abener aser iba tesem nung mepetmesü ama

tsübutepet. Bijni police-i tesem tonga oa poster ajak agizükogo aser bushisüngdangtsü tenzükogo.

Local MLA Ajay Kumar Roy aser Chirang district Trinamool Congress President Anirban Sen naprongi tesem semdang aser police dang iba mapa inyakertem aputsü atema takhangba agütsüogo.

CBI-i Arunachal nung DC inyaker ka dak tai tongloktsü

Itanagar, September 3, 2024 (Agencies): CBI-i IAS ketdangsur Padma Jaiswal anema chargesheet ka benokogo. Arunachal Pradesh nung la mapa inyakdang lai sorkar sen amshia lar kinungertem tenüng nung kiojen aliba atema tai tongloktsür.

Padma Jaiswal ya AGMUT cadre nungi 2003-batch IAS ketdangsur ka lir aser tang Pondicherry nung mapa lempzüka inyakdar.

2007 küm la Arunachal Pradesh kübok West Kameng

district nung Deputy Commissioner inyakdang sorkar sen tim mesü amshi.

CBI-isa taoba Finance and Accounts Officer Nor Bahadur Sonar aser taoba Cashier Rinchin Phuntsok na anema chargesheet agütsüogo. Iba mapang tenaprong West Kameng nung mapa lempzüka inyaka liasü.

Padma Jaiswal-i la nem tashi agütsüba nung ajemdaker ochimashi aser ozüngi memelaba mapa inyak. La nija meyong atema sorkar account

ka nungi sen agizüka agi. Padma-i Sonar aser Phuntsok na den külemi sorkar senotsü nungi yangluba Deposit at Call Receipts (DCRs) agien ta CBI-i ashi.

Padma-i Rs 28 lakhs indang demand drafts 10 yanglu aser Padma Jaiswal'er kinungertem tenüng nung kiojen alizük.

Padma-i Phuntsok aser taoba Finance and Accounts Officer Sonar na dang "returnable basis" nung agizüktsü ashi aser ibaji tim mesü amshi ta CBI-isa ashi.



Manipur kübok Kangpokpi aser Kakching district tem nung sepaitemi telungpur tesem ana mita aodang tapoktsü aser prangpong-injang aika ngutetogo. Tawa drone amshia yimtsüng aika amakba sülen sepaitemi iba mapa inyak. Telungpuri toktsür aoba teseper ana nung detonators 30, gelatine sticks 20, fuse 10 metres, country-made rockets, single-bore barrel rifles, improvised mortar, improvised mortar barrel, lead shot 2 kgs, radio sets aser bulletproof harnesses den helmet ngutetogo. (Imphal, September 3)

Mongolia-i Russia Tir Putin pelashishia agizükogo

Ulaanbaatar, Rongjui/Sept. 03 (Agencies): Russia Tir Vladimir Putin Hombar aonung Mongolia tonga aruogo, koba taoba küm pa aputsü atema osang sangdongba sülen International Criminal Court (ICC) züngsem linük mezüngbuba semdang alitsü.

Mongulbarnü iba linük yimtiba Ulaanbaatar nung Mongolia lenirtemi pa pelashishia agizüka liasü.

Ukraine nunger tila-tanurtem ozüing alema linük nungi meindok ta tai tonglokja aliba mechi ICC-i Russia lenir ya aputsü bushir.

Putin-i iba linük semdangba mapang aputsü tsüboa mali, ta Kremlin nungi odongtar kati ashi.

Russia lenir agizüktsü atema linük yimtiba nung aliba Genghis Khan Square nung sepaitem kor nung mener atatepa liasü aser live band kati linük ana indang anthem aten aser iba sülen pai Mongolia Tir Ukhnaagiin Khürelsükh ajurua liasü.

Hombar nikongdang square nung longkak aiter telok tilaka adenshia "Get War Criminal Putin out of here" ta zülua bener nokdaka liasü.

Ano Mongulbarnü Ulaanbaatar indang Monument for the Politically Repressed

nunga longkak aittsü sentong ka liasü, koba Soviet-i yariba communist yimsüsüba kübok Mongolia nung timtema alirtem bilemteta yangluba lir.

Security forces temi longkak aitertem Russia tir anasai meyoki nokdanga liasü.

Pai semdangtsü lia Ukraine-i Mongolia dang Putin aputsü ajungshia liasü.

"Onoki Mongolian ketdangsur dang international arrest warrant nung aliba ama inyaka Putin ya The Hague nung aliba International Criminal Court nem agütsüsü ajungshir," ta Ukrainian Foreign Ministry ajanga Telegram nung ashi.

Rara mapang mapa tamajung inyakba aser talisa Ukraine nunger tila-tanurtem ozüing alema Russia-i yokba ya Russia tir mapa lir ta court-i taoba küm tai tongloktsü.

ICC yagisa kasa aibelen atema Russia indang commissioner for children's rights, Maria Lvova-Belova aputsü shia lir.

Russia-i tashi ajak amshia February 24, 2022 nungi Ukraine amakdang mapa tamajung ya inyak ta aitsür.

Moscow-i item taitsüba magizük aser warrants ya tesümgangtsüka tamajung lir ta shia liasü.

Arrest warrant ya agütsüra ICC züngsem temi temulung melemi alir aputsü imlar, saka 'enforcement mechanism' kecha mali.

The Hague nung amenoka aliba court yagi taoba hopta züngsemtemi mapa inyaksüla ta shia liasü. Ajisüaka Mongolia yagi Ukraine mesüra ICC nem telangzüba agüja mali.

1991 küm Soviet Union laoba sülen taoba mapang Soviet kübok aliba linük ya Russia den tesendaktep tajung lir.

Russia-i Ukraine amakba parnoki aija mali aser United Nations nung vote agitepba nunga shilem magi.

Linük balala agi müketbanga aliba Mongolia ya China dena arütsüa lir aser gas aser electricity nung Russia dak metaloka alir.

Russia-i Yamal region nungi Mongolia ajanga China tashi küm nung natural gas 50 billion cubic metres (bcm) bener aotsü atema pipeline ka yanglutsü asoshi küm aika jembishinüa arur.

Russia-i Ukraine amakba mechi Europe nung gas ayongba ajema akumba melena Power of Siberia 2 nungja agütsür iba project ya tenzük.

MAMATETTER

Asür Takazungla (Longmisa)



4th September 2023

Oja, nai onok doktsür küm süia aodang, kecha dena matishitba ne akümüli sarasadem temeim mapatem aser ne sayu o tem onok mulung nung teti milen ama alir.

Temeim chirnur, semchir, anükapang & kinungertem

Na Onok Den Mali Küm Asem

T. Meren. Tzüdür

04 . 09 . 2021



Onoki na teti bilemer, na onok den ali ama jembir, aser kodanga mamateter aser mamatsü. Onok molungjang nung na teti lir, aser taküm piyong na onok den lia onok anüktsü. Asenok tanaben majuru tashi.

~ Temeim Kinüngtsü aser Chirnurtem.

DRC tepuokdak nungi jena aotsü merangba mapang nisung 129 tepset

Kinshasa, Rongjui/September 3 (Agencies): Democratic Republic of the Congo (DRC) ketdangsurtemi ashiba agi, linük yimtiba Kinshasa kübok central Makala prison nungi jena aotsü merangba mapang nisung 129 süogo.

Mongolbarnü X ajanga Interior Minister Shabani Lukoo-i ashiba agi, Hombarnü infirmery densema administrative building tem nung mi adokba mapang tepuokertem jena aotsü meranga liasü.

"Asürtem ajak agi 129 jungogo, kong tekümdangtsü metetdaksür mangaba ajanga kasetba nisung 24 densema lir," ta Lukoo-i ashiba den ano nisung 59 yiruogo, ta shisem.

Paisa, iba lendong nung osetsüt aika raksaoogo.

Lukoo-i ashiba agi, pai defence aser security service tem den mepetmesü dak sendakba nung senden ayongzüka mendar aser tensa aziüka lir.

Makala tepuokdak ya DRC nung tepuokdak tuluba lir, koba tepuoker 1,500 ayutsü atema yangluba lir.

Iba tepuokdak tang tepuoker 14,000 nungi 15,000 shi lir, ta

ketdangsurtemi metetdaksü. Tepuokertem timba obendangtsü atema atatepba mapang lir, ta Amnesty International-i ashi.

Taoba mapanga iba tepuokdak nungi tepuokertem jenogo, kong 2017 küm ozüing alema inyaksangshirtemi aonung iba tepuokdak amakba sülen nisung 4000 dak tema jena aoba densema lir.

Ketdangsurtemi tepuokdak nisung tajemba kümdaksütsü meranga arudar aser ita ishika tsüngda tepuokertem aika chiokogo.

Hombarnü tatalokba dak sendakba nung Congolese tir Felix Tshisekedi-i kecha telangzüba magütsü, shiba tang China semdangba mapang ka

Justice Minister Constant Mutamba-i ashiba agi, iba tepuokdak ya sentong yanglur amakba lir, koba tepuokdak jenjang ajungkettsütsü asoshi tang merangdanga aliba raksatsütsü asoshi lir.

"Iba inyakyim benoka inyakertertem jangja merenshitsu atema bushisüngdang südar. Aibelena alirtem nem temerenshi tesashi agütsütsü," ta Mutamba-i ashi.

Paisa, tepuokdak nungi tepuokertem tangaleni anir aotsü asoshi tenokdangba agütsüba sangdongogo aser ashiba agi, tepuokdak nisung tali puoka aliba tebilemtsü bentettsü atema tepuokdak tasen ka yanglutsü.

OFFICE OF THE
CHANGTONGYA SENSO TELONGJEM DIMAPUR
DIMAPUR: NAGALAND
Motto: Telongjem Aser Teyaritep

Ref. No: CSTD/Gen/9/2024 Date: 02/05/24

TENÜNGSANG AGÜTSÜR

Department of Environment, Forest and Climate Change, Nagaland nung Ranger jenjangi atuba atema T. Sama Jamir'er jabaso **Tsuknungtoshi Jamir** nem Changtongya Senso Telongjem Dimapur (CSTD) Dimapur Changtongya Tsur Telongjem (DCTT) aser Changtongya Kaketshir Telongjem Dimapur (CKTD) ajanga tenüngsang agütsür.

Tarutsü wadang nunga pa anema aliba aser Tsüngremi moatsüba takum ka südakjang ta sarasademtsür.

Sd/- Sd/- Sd/-
President, CSTD President, DCTT President, CKTD

TENÜNGSANG AGÜTSÜR

Tawa sangdongba NPSC 2023 result nung Kimatsung aser Noksangnaro na jabaso Loktimen-i Department of Personnel Administrative Reforms kübok Secretariat Assistant jenjang ngutetba atema Satsukba Senso Mungdang, Satsukba Village Council aser Satsukba kaketsuri Telongjem ajanga konang tetushi agütsür.

Nü tarutsü wadang nunga maneni takokba lidakjang ta sarasademtsür.



(Lanuakum) Chairman S.V.C


(Imkumzukba) President S.K.T

(Talisunep Ao) President S.S.M

MULUNGNEN O



ASO: 1st June 1947



ASÜ: 23rd Aug. 2024

Asür Tamsuenla (Longmisa)

Ozü mangyim jashi nung alidang ana aser talang nungi kiyonger, yimer, arogo, tembartem shirnokisa tamang sarasadem den nübu, rongsen tenla balala ajanga ozü mulung süngzükja yariogo, nenok ajak dang kinungertemi kanga dang pelaba iba shity ajanga lemsateper. Tematiba Tebu Tsüngremi nenok taküm kibong, lokti talubosa moajangma, ya ozu sarasadem.

~ Temeim Kinungertem

Luis Suarez international football asaya nungi anener



Rongjui/September 3, 2024

(Agencies): Uruguay nunger nungtugu football asayar Luis Suarez-i Hombarnü sangdong ka ajanga pa international football asaya nungi anenba sangdongogo. Paisa, Hokolbarnü Montevideo nung Paraguay den 2026 World Cup qualifier asayatsü aliba ya parnok asoshi linük tenüing nungi tatembangbuba asaya asütsü ta ashi.

“Hokolbarnü ni linük tenüing nungi tatembangbuba asayatsü,” ta arishi küm 37 tain Suarez-i osangbenertem den sensaksemba mapang ashi.

“Iba telemtetba agitsü temela masü asü, saka linüki tenüing nungi tatembangbuba

asaya takokba tashi asayatsü ta bilema yimjung nung iba telemtetba agir,” ta pai ashi.

Taoba mapang Barcelona aser Liverpool nungi striker ya par putu nung asayar tajungtiba rongnung ka ta züingshir aser pa Uruguay nunger asayartem rongnungi goal timtiba idaktsüba asayar ama asaya nungi anentsü. Linük tenüing nungi 142 ben asayaba mapang pai goal 69 idaktsüogo.

Suarez, shiba 2014 World Cup nung Italy nunger asayar Giorgio Chiellini dak anguba atema ita pezü asoshi tenokdangba agüja liasü, pa Uruguay tenüing nungi 2007 küm mezüingbuba asaya liasü. Inter Miami nungi

asayasang yagi, Uruguay-i 2011 küm Copa America akokba mapang team nem teyari tulu agütsü, aser iba asayamung nung pa nem player of the tournament naroküm agüja liasü. Linük tenüing nungi pa tongibang asayamung teku nung shilem agiogo.

Suarez-i Hombarnü ashiba agi, Uruguay team-i Copa akokba ya pa indang career nung ajak dang tongtibangtiba lir.

“Ni Copa America title ya kecha dena memelenteptsü. Iba asayamung akokba ya kü indang career nung ajak dang tongtibangtiba asayamung lir,” ta pai ashi.

Chelsea winger Angelo Al-Nassr nung denogo



Rongjui/September 3, 2024

(Agencies): Brazil nunger winger Angelo Gabriel, shiba Chelsea nungi asaya ka nung danga masayai liasü, pa Saudi Pro-League club Al-Nassr-i pound million 19 agi alizükogo.

Arishi küm 19 tain asayar ya 2023 küm July ita Santos nungi pound million 13 yong Stamford Bridge nung oa aden aser taoba season Chelsea indang sister club Strasbourg nung loan nung oa asaya liasü.

2020 küm October ita arishi küm 15 ser anogo 308 asüba mapang pa Santos nungi Fluminense den asayaba sülen pa ya Brazilian top flight nung asayaba asayartem rongnung tanobusang aküm.

Chelsea-i asayar atema sell-on clause ka benokogo, shiba Al-Nassr nung Cristiano Ronaldo aser Sadio Mane na den asayatsü.

Kasa mapang nung Daniel Podence-a Wolverhampton Wanderers nungi pound million 5 yong Al-Shabab nung oa denogo.

Arishi küm 28 tain Portugal nunger winger ya 2019 küm nungi Wolves nung 108 ben asayaogo aser iba mapang pai goal 16 idaktsüogo.

Pa taoba season Olympiacos-i loan nung oa asaya liasü.

Saudi transfer window Hombarnü nikongsütsü shibangogo.

Al-Nassr dang Angelo ayokba ajanga Chelsea pur rongsenketzung nung tajanzük angutsü. Taoba küm Santos nem taah agütsüba nungi Chelsea pur pound million 6 shi tajanzük angutsü aser asayar ayokba taah ajak senteper pound million 188. 9 shi asütsü.

Loan fees aser sell-on clause tem nungi anguba taah tem sangdongra ajak senteper pound million 200 dak tema asütsü.

Iba ajanga Genk goalkeeper Mike Penders aser Palmeiras winger Estavao Willian na medeni asayar 11 alizükba mapang sen intokba ya pound million 208.5 shi agi liromedema kümdaktsütsü.

Lord nung 2025 World Test Championship final asayatsü

Rongjui/September 3, 2024

(Agencies): Lord's nung tang mezüingbuba 2025 küm World Test Championship final ayongzuka asayatsü, ta International Cricket Council-i sangdong ka ajanga metetdaktsüogo.

2023 küm Oval nung World Test Championship final asaya nung Australia-i India akok aser 2021 küm Southampton nung iba asayamung mezüingbuba final asaya New Zealand-i koka liasü.

Anogo pongu asayatsü aliba final ya June 11 nü tenzüktsü, koba Test Championship rankings nung temaba jenjang nung aliba team ana tsüingda asayatsü.

Test Championship rankings

nung tang India team temaba jenjang nung aser Australia tanabuba nung lir. Tena sülen New Zealand tasembuba aser England pezübuba nung lir. Taoba ita 18 tsüingda Test asaya 15 asayaba mapang trok nung tamakok anguba sülen England team pezübuba nung lir.

Iba asayamung nung shilem agiba team teku ya küm ana tsüingda parnok Test asaya asayaba dak ajemdaker rank agütsür. Tang cycle atema 2023 küm nungi ranking agütsü tenzükogo.

Lord's nung final asayatsü aliba team ya taruba küm January 28 nü jangjatsü. Final asayatsü asoshi New Zealand, England aser South Africa nungera maneni timla lir.

US Open: Sinner aser Medvedev na quarterfinal asayatsü



Jannik Sinner

Daniil Medvedev

Rongjui/September 3, 2024

(Agencies): Italy nunger world No. 1 asayar Jannik Sinner-i Mongolbarnü US Open tebur kija asaya nung USA nunger asayar Tommy Paul koka quarterfinals-i iogo, kong pa Daniil Medvedev den asayatsü.

Italy nunger asayar yagi America nunger asayar ya set asem nung dang 7-6, 7-6, 6-1 agi koka Medvedev den pezübenbuba asayatsü asoshi maongka ngutetogo.

Iba asayamung pezüben koker alisang Djokovic aser 2022 champion Alcaraz na tsükatokba sülen taoba mapang iba asayamung koker aliba asayartem rongnung Medvedev kija anunga lir. Pa küm trok nung tang agi pongubenbuba US Open quarter-final asayatsü lir.

Paul akokba sülen Sinner kijai taküm Grand Slams pezüprongla nung quarter-finals tongtetogo.

Sinner-i taküm Australian Open final nung Medvedev

kokogo aser iba den Miami semi-finals nunga pai Medvedev tsükdakja liasü.

Kasa mapang nung Medvedev-i Wimbledon quarter-final nung set pongu asayaba sülen Sinner koka liasü.

Tebur kija asaya nungsa Medvedev-i Round of 16 asaya nung Portugal nunger Nuno Borges 6-0, 6-1, 6-3 agi koka liasü.

Tetsür kija asaya nung World number one Iga Swiatek-i Liudmila Samsonova straight-set nung koka US Open quarter-finals-i iogo.

Arishi küm 23 tain Poland tsürila yagi 16th seed Samsonova ya 6-4 6-1 agi ayong ayonga koka liasü.

Tang agi tanabenbuba Swiatek-i US Open quarter tongtetogo. Lai 2022 küm iba asayamung koka liasü.

Grand Slam pongu tashi koker alila Swiatek, taruba asaya America tsür Jessica Pegula den asayatsü.

BILEMDANGANG

"Menürem jakden jagi tejashi samadaktsür."